

**Qanoq iliornikkut aalisakkat massakkut tunisassiaanngitsut aalisarfiunngitsuni atorluarsinnaalerumallugit aalisartut isumannaannerusunik anginerusunillu aalisariutitaarsinnaanissaannik tapersiisinnaanerluta apeqquteqat aallaavigalugu oqallisissiasatut siunnersuut.**

(Inatsisartunut ilaasortaq Siverth K. Heilmann, Atassut)

### **Akissuteqaat**

(Aalisarnermut Piniarnermut Nunalerinermullu Naalakkersuisoq)

Naalakkersuisut oqallisissiatut siunnersuuteqartumut Inatsisartunut ilaasortaq Siverth K. Heilmann, Atassut siunnersuummik saqqummiussaqaqarneranut qujapput.

Siunnersuuteqartup erseqqissarpaa aalisartut oqariartuutaat ersarissaq aalisartullu aalisariutinik anginerusunik pisariaqartitsisut aamma, aalisariutaat isumannaannerusuusut avasinnerusumullu angallatigineqarsinnaasut aamma ikkannerni aalisarfiunngereersuni aalisariutaasinnaasunik pisariaqartitsisoqartoq. Tamatuma saniatigut siunnersuuteqartup erseqqissarpaa Inatsisartut aalisartunut periarfissiisariaqartut nutaanik aalisakkanik massakkut tunisaanngitsunik qalluilersinnaanissaat pillugu tapersersuisariaqartut

Naalakkersuisut isumaqarput aalisartut aalisariuteqassutsimi nutarteriffigineqarnissaannut apeqqutinut namminneerlutik aqutaminnik aamma piumasaqaatinut sapinngisamik annertusisamik periarfissaqartinneqarnissaminnik kissaateqartut. Sapinngisamik nammineq nutarterinissartik aningaasalersorusukkaat. Ataasiakkaaqaqporli pisortat periarfissarititaannik ikiorserneqartariaqartunik peqarluni.

Ullumikkut inatsit atuuttoq, tassalu Aalisarnermut aningaasaliissutinut immikkoortitat pillugit Inatsisartut inatsisaat nr. 15, 20 november 2006-meersoq, malillugu, kapitel 2, §3 imatut allaqqavoq:

*“Kalaallit Nunaata aalisarnikkut pisuussutaanik ineriartortitsinermut taakkuninngalu atui-nermut iluaqutaasutut nalilerneqartunut ingerlatsinissamut, Naalakkersuisut misiliutigalugu nutaanik suliniutinik pilersitsinernut, misileraalluni aalisarnernut assigisaasaluunniit, naam-massineqarnissaannut tapiissutinik tunniussisinnaapput, uku ilanngullugit:*

*1) Imartap aalisarnikkut periarfissaanik, immikkut aalisagaqarneranik aamma aalisarnerup allanngortinneqarsinnaaneranik periarfissanik misissuinernut.*

*2) Aalisarnermi atortunik pitsanngorsaaneq naammassisaqarnerulersitsinerlu, aalisariaat-sinik allanik misileraaneq sungiusarnerlu.*

*3) Ataavartitsiniarluni suliniutinik killilersuinermilu periutsinik misileraanerit, ilanngullugit aalisarnermi atortunik immikkoortiterisinnaasunik qajassuussisinnaasunillu inerisaaneq misileraanerlu.*

*4) Aningaasaqarnikkut iluanaaruteqarnerup pitsaanerulernissaa siunertaralugu tunisassianik aamma tunisassioriaatsinik pioreersunik inerisaaqqinneq pitsanngorsaanerlu.*

*5) Aalisakkanik tukertitsivinnik pilersaarusiornissamut misissuinerit ineriartortitsinermilu suliniutit.”*

Inatsimmilu tassani kapitali 4, §8 imm. 1 malillugu periutsinut qulaani taaneqartunut Naalakkersuisut tapiisinnaapput suliniummi aningaasartuutit 50%-ii tikillugit.

Inatsit qulaani pineqartoq 2006-meersoq malillugu aammattaaq periarfissaqarpoq sinerissap qanittuani nutaamik aalisariutitaarnissamut taperneqarnissaq. Inatsisartut inatsisaat nr. 13, 2. december 2009-meersoq §1, imm. 4 malillugu imatut periarfissaqarluni:

*”2) Raajat saniatigut aalisarnerni allani pisinermi nalingata tamarmiusup 40%-ia tikillugu.”*

Inatsisit ullumi atuutereersut malillugit misileraalluni aalisassagaanni, soorlu sumiiffinni nutaani misileraanermi aningaasaartuutit 50%-ia angullugu tapiiffigineqarsinnaaneq periarfissaareerpoq. Taamaattaaq nutaamik angallatitaassagaanni aamma aalisarnissamut nutaarluinnarmut naleqquttumut pissarsiarineqarnerata nalingata 40%-ia angullugu tapiiffigineqarsinnaalluni, angallammullu nutaamut piniutit aalisarnermut atortut, aalisariaatsimut nutaamut naleqquttut aalisariutissap akianut aamma ilaatinneqarsinnaallutik.

Ukiuni kingullerni angallatitaarniarlutik qinnuteqartartuni aamma ilaqarpoq aalisariutit aalisariaatsinut assigiinngitsut atorneqarsinnaasut. Angallatit arlariissunik assigiinngitsunik aalisarsinnaasut iluatsissimasutut oqaatigineqarsinnaapput.

Ullumikkut inatsisit pioreersut toqqammavigalugit uani oqallisissiami aalisariaatsit nutaat, aalisarfiusinnaasullu nutaat misilerarnissaannut tunngatillugu Naalackersuisut isumaqarput, nutaamik sinerissap qanittuani aalisarnissamut naleqquttumik angallammik pisaassagaanni periarfissaqartoq taperneqarnissamut qinnuteqarnissamik.

Naalackersuisut taamaammat isumaqarput qinnuteqarusuttunut nutaanut periarfissaatitaasut pioreersut.

Naggataatigut Naalackersuisut innersuusserusupput, Inatsisartuni ilaasortamit Henrik Fleischer-ip, Siumumeersup siunnersuuteqarnerata kingorna Naalackersuisut nalunaarusiaannut, uvani pineqarluni *“Inuussutissarsiuutigalugu aalisarnikkut angallateeqqanik kvoteqartussanik minnerpaaffiliinissami takissuseq 9 meter aallaavigalugu pitsaaqutinik ajoqutinillu nassuiaateqaqqullugit ukiuni 12 ikaarsaariarfeqartillugit Naalackersuisut nalunaarusioqqullugit peqquneqarnissaanik Inatsisartut aalajangiiffigisassaattut siunnersuut.”*

Taamaalilluni qulaani pineqartunut ilanngullugu kigunerisinnaasai aamma aningasatigut, oqallisigineqarnerini eqqumaariffigineqarnissaa.

Taamatut naatsumik oqaaseqarlunga, apeqquteqaat aallaavigalugu oqallisissiatut siunnersuut tunngavigalugu Inatsisartut oqaallilluarnissaannik kissaappakka.